

SANDE 4 BILONG ISTA

I.RIT

Ap 13:14, 43-52

Akar dapanim: Ga uam akam ia mikimn kogham, ga gumazamzir igharaziba akam me mikimam.

Akar kam, an Aposelbar Ingangaribar Akinafarimin aven iti.

Ezi me Pergan nguibamin dikavigha ghua Antioghin nguibamin otifi, a Pisidian Distrighin aven iti. Egha, Judaba avughsa Godin ziam fer dughiamin, me God ko migeir dipenimin aven ghueghava apiaghav iti.
*

Egha me bar God ko migeir dipenim ateghava azenan ghue. Ezi Judan avirim ko gumazir igharaziba, me Judan araziba bar dar gin zuir gumaziba, me Pol koma Barnabasin gin zui. Ezima aning me migiava, men nighniziba fa ghaze, ia Godin nighnizimin gin mangiva an apangkuvimin apengan iki.

Ezi Sabatin dughiar igharazim otozi, nguibar ekiam kamin itir gumazamizir avirim bar iza uari akuvaghava Ekiamin akam barasi. Ezi Judaba gumazamizir okuruar kamin ganigha, men naviba bar ikufi. Ezima me Polin Akaba kurakuraghava a migei.

Kamaghin amizima Pol ko Barnabas atiatir puvatigha, akar bar gavgavimin me migei, "Ia Judaba, ga faragha Godin akamin ia mikeme. Ezi ia akirim ragha akar kam gasara. Egha ghaze, e ikirimirir aghuir zurara itim inian kogham. Kamaghin amizima, ia oragh, ga uam akar kamin ia mikiman kogham. Ga Kantrin Igharazibar Gumazibav kimam. Ekiam bizir kam bagha kamaghin e mikeme:

'Ni nguazir kamin itir gumazamiziba bar men akuraghtima ki ua me iniasa, bizir kam bagh, ki ni amisevezima, ni tuavim Kantrin Igharazibar Gumazibar aka.' "

Ezi Kantrin Igharazibar Gumaziba, me akar kam baregha, bar akuegha ghaze, akar kam bar dera. Ezi gumazamizir God ikirimirir aghuir zurara ikiam bagha miseveziba, me bar nighnizir gavgavim an iti.

Ezi Ekiamin akam bar nguibaba bar dar ghu. Amizir maba God gifueghava an apengan ikiava ziar ekiaba iti, ezi gumazir iziaba itir maba, me uaghan nguibar ekiam kamin iti. Judaba men navibagh inivima, me osimtiziba Pol ko Barnabas garisi. Egha me uan distrighin aning batoke. Kamaghin amizima, Pol ko Barnabas, uan dagarimningin itir nguaziba apisi, eghtima gumazamiziba fogh suam, men arazir kam osimtizim me ganingi. Ezima, Pol ko Barnabas Antiok ategha Aikoniam nguibamin ghu. Kamaghin amizi Antioghin itir Kraisin suren gumaziba, Godin Duam bar me gizivazima me bar akonge.

Kar Godin Akam.

SAM

Sam 100:1-3, 5

Ia akam ikaragh: E Ekiamin gumamaziziba, e Ekiamin divazimin aven itir sipsipba.

Ia nguazimin itir gumamaziziba bar, Ikiavira Itir God bagh pamtem dimiva bar akongegh an ziam fi.

Ia Ikiavira Itir Godin ingangarim damu an ziam fiva bar akongegh.

Ia an boroghin iziva bar akongezir ighiaba bangi.

Ia akam ikaragh: E Ekiamin gumamaziziba, e Ekiamin divazimin aven itir sipsipba.

Ia kamaghin fogh, Ikiavira Itir God a guizbangira God.

A uabi en ingarizima e an adarazira.

E an gumamaziziba, egha an sipsipbar min iti.

Ia akam ikaragh: E Ekiamin gumamaziziba, e Ekiamin divazimin aven itir sipsipba.

E fo, Ikiavira Itir God arazir aghuibarama amua, egha zurara bar en apangkuvighavira iti.

Egha a damuasa mikemegha givazir biziba, a zurara adagh amua kamaghira iti.

Ia akam ikaragh: E Ekiamin gumamaziziba, e Ekiamin divazimin aven itir sipsipba.

2. RIT

Re 7:9, 14-17

Akar dapanim: Sipsipin nguzim atrivir dabirabimin tongira ikia me ghuava men gari. A me inigh mozir dipamin mangam. Kar mozir dipar ikirimirir zurara itim anidim.

Akar kam, a Mogomer Akar Aghuriaghirizimin Akinafararim, o Revelesen, an aven iti.

Egha ki gin ua gari, gumamazizir avirim uari akuvagha iti. Gumazitam men avirim mengan iburagham. Gumamazizir kaba, me kantriba bar ko anababa bar ko mikarzir igharagha gariba bar ko nguibabar Akaba bar dar gumamaziziba, men marazira izegha iti. Me atrivir dabirabim ko Sipsipin Nguzimin guamin tuivighav iti. Me korotiar ghurghurir ruariba aghui, egha uan agharibar okavir aghuabar suiki.

Ezi ki an akam kamagh a ikara, “Gumazir ekiam, ni uabi fo.” Ezi a kamagh na migei,

“Gumamazizir kaba me uan apanibar dafaribar osimtiziba ko mizazir ekiaba ini.

Ezi osimtizir dughiam datirighin gifa.

Ezi me uan korotiaba Sipsipin Nguzimin ghuzimin da ruegha, dagh amizi, da ghurghuri.”

Kamaghin amizi me atrivir dabirabimin guamin tuifi.

Egha dimagariba ko aruebar an dipenimin ikia egha an ingangarim gami.

Ezi Godin atrivir dabirabir kam gaperaghav itim, a uabi me ko iki egh me geghuvam.

Eghti mitiriaba ua men aghan kogham, eghti kuariba ua men piran kogham.

Eghti aruer arizir mikarziba puvira dagh aboim, ua men mikarzibar isian kogham.

Sipsipin Nguzim atrivir dabirabimin tongira ikia, egha me geghufi.

Egha a me inigh nguazimin aven
ivemarir dipar atuir danganimin
mangam, kar dipar ikirimirir
zurara itim anidim.
Egh God men temeriba bar men
damazibar da dizighti da

misigham, eghti me uam azian
kogham.”

Kar Godin Akam.

WELKAMIM GUTNIUS

Aleluia, Aleluia.

Ki uabi sipsipbar eghuvir gumazim. Ki uan sipsipbagh fozì nan sipsipba na gifo.
Aleluia.

GUTNIUS

Jo 10:27-30

Akar dapanim: Ki ikirimirir aghuir zurara itim me ganidi.

Ia, Krais Iesusin Akar Aghuir Jon osirizim, a baragh.

Nan sipsipba nan tiarim barasi, ezi
ki me gifozi, me nan gin izi. Ki zurara
itir ikirimirir aghuarim me ganidi,
eghti me ovengan kogham. Bar puvati.
Eghti gumazitam nan dafarimin me
batueghan kogham. Nan Afeziam me
isa na ganingi. Egha an gavgavim bar

ekeveggha, bizir igharazibar gavgaviba,
bar dagh afira. Kamaghin amizi
gumazitam an dafarimin me batueghan
kogham. Ezi ki uan Afeziam ko, ga
gumazir vamiran min iti.”

Kar, Krais Iesusin Akar Aghuim.

